

Betico Croes

Alma y Curazon di nos Himno y Bandera

Dia nacional di nos pais Aruba, dia 18 di Maart sigur ta un dia hopi significativo y especial pa cada un di nos como un pueblo cu ta stima e pais Aruba.

Sr. Betico Croes a cuminsa cu e lucha berdadero pa nos Status Aparte sin mira ariba e distincion di raza, religion y color politico, pa medio di introduccion di nos propio Himno y Bandera, cual awe nos ta reconoce como nos simbolonan di cual fecha awe, 18 di Maart, nos ta reconoce como dia nacional. E fruta di nos Status Aparte cu Sr. Betico Croes a laga atras pa nos, a duna nos fuera di nos propio Himno y Bandera, nos propio constitucion, nos propio parlamento y nos propio gobernador. Nos himno y bandera tabata inicio di e gran cambionan pa cu e pais Aruba.

Ta pa casualidad e 18 di Maart 1973 tabata exactamente 25 aña despues di e



Sr. Glenbert Croes cu e bandera di Aruba dilanti di e busto di tata Betico.

Conferencia di Mesa Rondo na 1948, a ser entrega un mocion y acepta pa Aruba

sali for di constelacion Antiyano pero decision aki nunca a ser concretiza ni siquiera recorda.

Un lucha cu a inicia cerca Henny Eman y a haya mas contenido cerca Juancho Irauquin y cual a keda coro-

na pa e determinacion y perseverancia di Betico Croes. Un lucha cu a para bira e orguyo di un pueblo cu semper a kere den capacidad y den su integridad. Un lucha cu a worde corona cu logro di un Status Aparte cu a habri caminda pa cambionan grandi den nos pais.

E inicio tabata nos Himno y Bandera. Nos bandera a haya un toque especial ora cu e gran lider a pidi su pueblo pa recoge e bandera y sigui cu e lucha pa libertad si algo pasa cu ne.

E gran lider a bin logra e anhelo di su pueblo, cual tabata e Status Aparte. E moral y insistencia di e lucha aki a bira e Himno y Bandera cualnan a bira e sosten moral y spiritual di e lucha aki.

Su amor y orguyo demostra pa e Bandera y Himno di Aruba a pone cu den tur hogar na Aruba nos colornan nacional a haya un acogida fenomenal.